

- 1^r Wem sackpiffen freüd / kurtzwil gytt
- 2^r Vnd acht der harpff / vnd luten nytt
- 3^r Der ghört wol vff den narren schlytt



von vngedult der straff

- 1 Eyn gwisses zeichen der narrheyt
- 2 Jst / das eyn narr nyemer vertreit
- 3 Noch mit gedult gelyden mag
- 4 Das man von wißen dingen sag

5 Eyn wyser gern von wißhey^t hört
 6 Do durch syn wißheit würt gemert
 7 Eyn sackpfi^f ist des narren spil
 8 Der harppfen acht er nit vil
 9 Keyn g^ut dem narren jn der welt
 10 Baß dann syn kolb / vnd pfi^f gefelt
 11 Kum loßt sich stroffen der verkert
 12 Narren zal ist on end gemert /
 13 O narr gedenck z^u aller fryst
 14 Das du eyn mensch / vnd d^otlich bist
 15 Vnd nüt dann leym / äsch / erd / vnd myst
 16 Vnd vnder aller creatur
 17 So hat vernunfft jn der natur
 18 Bist du das mynst / vnd eyn byschlack
 19 Eyn abschum / vnd eyn tr^usensack
 20 Was überhebst dich dins gwalt /
 21 Dyns adels / richt^um / jugent / gestalt /
 22 Sidt als das vnder der sunnen ist
 23 Vnnütz ist / vnd dem wißhey^t gbrist
 24 W^ager das dich eyn wiser stroff
 25 Dann dich anlach eyn narrecht schoff
 26 Dann wie eyn brennend dystel kracht
 27 Als ist eyn narr ouch wenn er lacht /
 28 Sellig der mensch der jn jm hat
 29 Allzyt eyn schrecken / wo er gat
 30 Der wisen hertz / truren betracht
 31 Eyn narr alleyn vff pfi^fffen acht
 32 Man sing vnd sag / man fl^oh vnd bitt /
 33 Ab syn elff ougen kumbt er nit
 34 Vmb keyn stroff / ler / er etwas gitt